



DEO OPTIMO MAX.
UNI ET TRINO,

VIRGINI DEI-PARÆ, ET S. LUCÆ,
Orthodoxorum Medicorum Patrono.

QUÆSTIO MEDICO-CHIRURGICA,

QUOD LIBETARIIS DISPUTATIONIBUS,
*manè discutienda in Scholis Medicorum, die Martis vigesima-
secundâ Februarii, Anno Domini M. DCC. XLVI.*

M. JOANNE-CLAUDIO MUNIER, Consiliario
Medico Regis ordinario, & Domûs Regiæ Invalidorum,
Doctore Medico, Præsîde.

*An post gravem, ab ictu vel casu violento, capitis contusionem, etiam mediocriter
suspectâ cranii fracturâ vel fissurâ, cutis unâ cum pericranio ad os usque incidenda?*

I.



ASCI-NE erat tanti? infantiam, somnum, tempora cibi, potûs,
& tædii si computes, pueri vix sumus, senes jam videmur. Quisque
tamen vult vivere: anus putida, miles ærumnosus, Irus egens,
senex calculosus, *podagricus*, *silicernius*. Media inter tormenta
mortem deprecamur, quocumque pretio fatum protelare avidi.
Amaritudine sanitatem redimimus. Medicinam tutelarem Deam
experiri cupimus cujuslibet pignoris dispendio. Jubeat Medicina membrum rescari?
tollitur: adeo dulce est sperare ferius mori! Ferrum in viscera cruentum adigit?
ignes inurit faucibus partibus? fiat: dummodò vivamus. Post gravem ab ictu vel

casu contusionem terebra admovenda est? admotam sanatus gaudet æger. Incertum an admovenda? cutemque & pericranium unâ evellenda censeas, ut liquidò constet quid sit agendum? Urite, inquit æger, secate, radite, modò vivam. Apparatus sanè ipsâ terebrâ crudelior: at sæpè necessarius magis. Præceptis quispiam è scalis aut loco edito cecidit? caput in lignum, ferrum aut lapidem, cranio duriora videlicet, impegit? vehemens sanè commotio. Totius cerebri moles immensa sedibus dimota suis divulsæque validè intus contremuit reperiçssa fortiter in parietes cranii? Forsan dissiluerunt & ipsi parietes fragminibusque (sanâ extûs remanente cute) meninges torquent, vellicant, pungunt. Interdum sola adest contusio gravibus stipata symptomatis, etsi nulla adsit fissura aut fractura; aliquandò utrumque reperitur. In arenâ consiliûm capere hoc opus, hic labor. Rebus tam obscuris quis asseret lucem? Omne feret punctum qui unâ cum luce medicinam dabit. Hoc ut assequare nullus non movendus lapis.

I I.

FELIX nimium qui potuit rerum causas cognoscere! Sæpè satis felix qui tantum rem ipsam posset cognoscere. A gravi capitis percussione magnorum malorum nascitur Ilias. Nec plerumque majora apparent: sæpè grandiora & præcipua latent intus: imò quæ latent ferè sola sunt vera mala: collisio scilicet substantiæ pulposæ cerebri in interiores cranii parietes, sugillatio, aut fractura in ipsis ossibus. Reliqua apparentia ut phrenitim, Emphysema, hæmorrhagias, febrem & cætera, signa tantum & effectuum effectus habeto. Per hæc, si apparent omnia simul & gravissima, imminenter vaticinare mortem: si minora urgent aut pauciora, cave fidas infidæ paci. Ignis latet suppositus cineri dolofo. Ne temnas tamen signorum conjecturam. His magnitudinem mali præsertim experto & seni Medico conicere datur. Ex dolore capitis acutiori, lancinante, cum stupore, tinnitu aurium, vomitu, cerebri vehementer concussum, ibique nasci & ali abscessum judica. Ex frontis, oculorum, faciei intumescentiâ pericranium osque forsân ipsum valdè contusum credere est. His adde hæmorrhagias per nasum, illæsis in ictu partibus externis nasi, per oculos, per aures, iisdem posititis, cranium fissum vix dubitare licet. Spasmi miserè convellitur æger, delirat, truci aspectu terribilis è lecto furiosus exsilit: dura meningx fissurâ internâ, etiam si nihil in tabulâ cranii exteriori appareat, convulsa torquetur; at interdum Comate hæc omnia sopiuntur signa. Hic hæreret vel ipse Tiresias. Tunc judicium difficile. Paucis quos æquus amavit Omnipotens; hæc omnia certâ datur assequi conjecturâ. Haud faciliè contusionem simplicem cutis cum levi & periculi experte commotione cerebri, ab ossis externæ tabulæ depressione discernas: contusionem externæ tabulæ ossis ab utriusque disruptione. Fissuram internæ seu vitreæ solam quis adeò Lynceus ut pervideat? Abscessum vix post hebdomadas, menses, annos adesse evincas. Juvandæ rationi quàm benè, ô bone Deus, addidisti sensus. Non jam sibi placeat adeò nec superbiat *Ratio* de fallaciâ sensus arguendo. *Ratio* definit hic esse *ratio*, nisi sensus veniat in consiliû partem & auxilium.

I I I.

LEVI tantum commotione exceptâ nullis gravibus stipatâ symptomatis in utroque casu confert incisa cutis ad cranium usque & detectum illic subiectum os, per incisionem pericranii. Sic lucem simul cum Medicinâ dubiis ægræ rebus,

afferet. Si adfit fractura, plaudes sanè! At si offe nudato integrum os & sincerum appareat; putas grande piaculum commisisse, nec ullà lustratione abluendum? Vulnere simplici cutem afflixisti: nec putes idèd os esse *exfoliatum* permittendum: coalescet vulnus paucorum dierum spatio: ac non sine magno ægrotantis juvamine contusum forsan pericranium incisione relaxabitur, detumescet facies, venæ cum internâ parte cranii committentes exonerabuntur; tabum seu sanguinem concretum evoment, & si intus adfit commotio & abscessus, exterminabunt. At nisi remiserint dilucidè omnia symptomata post tres aut quatuor dies, cave vulnus coalescere permittas. Angulus plagæ, vel cruciatæ, vel stellatæ, vel cuiuscumque figuræ plumaceolis sublevatos ab offe arceas, ut, si perseveraverint, delirium, coma, convulsio, aphonia, oculorum tensio, suffusio, &c. terebram quamprimum admoveas. Isthæc enim incisio vel per se remedium est gravium symptomatum ubi non adest fractura, vel indicium omnium certissimum fracturæ, si forsan adfuerit; vel in utroque casu, si per se non medetur, viam non aliudè parabilem sternit ad ultimum omnium auxilium, Terebram.

I V.

PRINCIPIIS obsta; medicinam serò paraveris, cùm immedicabile per moram factum fuerit vulnus. Turpe Medico non tanti æstimasse malum quanti erat æstimandum. Malè excusatus valeat cum suo *non putabam*, cùm potuit scire, inspicere, propriis manibus palpare. In re periculi plenâ attendendum, timendum, cavendum quidquid luctuosum magis & portentosum. Agendum quasi certa salus operam sequeretur. Omnia tuta time; in deploratis nunquam despera; bonorum tamen verborum & promissorum haud prodigus indecenter. In negotio ancipiti viriliter operare, quasi penès te foret eventus. Cautè rem age & providenter, quasi omnia mortem intentarent. In cranio vehementer contuso cave fracturam, commotionem aut sugillationem, undè collectio materiæ stagnantis, corruptio, abscessus. Nec idèd sperare ac proinde agere te deterreat ingens accidentium cohors. Paucis quidem ex orci faucibus superas evadere ad auras, & ab ipso Averni limine remeare datum est: at quod pauci potuèrunt, cur iste non poterit, & iste manu auxiliatrice adjutus. Conare magna: permitte Superis cætera. Unica via est incisio, quâ latens in offe virium detegas, eâ solâ obliquæ fissuræ fraudem relevabis. Interdum solo pericranii tritu, vomitus, convulsio, febris, phrenitis, oculorum spasmus, tetanus, &c. collisioni capitis superveniunt. Laxatâ per incisionem pericranii crispaturâ, hi motus inordinati fibrarum atque hæc tam gravia symptomata levi operâ compressa quiescent. Nisi remittant, ulterius ferro aggredere ipsam os; parata via est. Tunc otiosum spectasse naturam pigeret, & fessile lætaberis quæ puderet distulisse.

V.

SERIOREM ergò pœnitentiam dùm licet præveni catus, incisione prudenter & peritè, pro ratione loci & magnitudine periculi factâ. Absit ut missa faciam quæsitâ aliudè magna præsidia, ut frequentes & copiosas sanguinis missiones, diætam exquisitam, & quacumque valent sanguinem concretum intus & extus admota resolvere. Sæpè doctâ plus valet arte malum, & quamvis nihil horum omiseris, vix in vado constituitur æger. Quid? si neglexeris. Non me tunc emensorum quadraginta aut sexaginta dierum (post quos vita vulgò creditur incolumis & omnis periculi experta) clapsa series securum idèd præstiterit; vel minimis sympto-

matibus adhuc perterrefiam. Minimus capitis dolor, me iudice, abscessum minaretur. Nec crudelem me facere medicinam quisquam arguat. Crudeliter illum misericordem dico, qui, dùm potest servare civem, metuit, mortem (grande sanè malum) levi malo propellere. Non in contusione, quam parva sequitur & externa tantùm fugillatio, secandam cutem, secandum proponimus pericranium; at ubi hæmorrhagia, faciei tumor, delirium, vertigo, &c. gravia comitantur symptomata, etiam si, illæscute, certè non possit asseri fractum esse cranium, imò etiam si cranium non esse fractum ferè pro certo teneatur.

Ergò post gravem, ab ictu vel casu violento, capitis contusionem, etiam mediocriter suspecta cranii fracturâ vel fissurâ, cutis unâ cum pericranio ad os usque incidenda,

DOMINI DOCTORES DISPUTATURI.

M. Petrus Poissonnier, Professor M. Guillelmus Ruellan,
& Censor Regius.

M. Antonius le Camus.

M. Petrus Arcelin.

M. Claudius Boudier de la Moulière.
M. Petrus Chevalier.

M. Ludovicus-Maria Pouffe, Censor
Regius & Chirurgiæ Professor.

M. Antonius Casamajor, Censor
Regius.

M. Raymundus de la Rivière.

Proponēbat Parisiis JOANNES-FRANCISCUS PARIS, Parisinus;
Saluberrimæ Facultatis Medicinæ Parisiensis Baccalaureus,
A. R. S. H. 1746, à sextâ ad meridiem.